

Requiem for an auld frere

Quhat is this lyfe bot ane straucht wey to deid ?
— Dunbar

by

Andrew Owen Lindsay
MA (1968) B.Phil (1973)

A composition in Lowland Scots submitted as an entry for the
Sloan Prize.

December 1990

Kyrie

Hallow-day; the fest o aa the saunts, an cranreuch-cauld.
Ma walk at e'en led me tae an antrin gate:
I wandered frae the path an kenned-na whaur I wis,
Doolie thochts dirlin, black an dour, in ma mind.
I draigled by barescrape bushes, rid-bricht wi berries,
An the cauld air — shairp, schellachie —
Grippit aathin, nippin, as the doon-gaun sun
Blezed bluid-rid in the gloam.
Syne I cam, by Lord-kens-whit path
Tae the braid sea
θαλαττα θαλαττα
An a straik o saun, blawn wi saut-bree.

I minded oor wurd
deid, dry —
Echoes frae times
lang by ...
— We'll hae tae get thegither, ane o thae days ..
— Aye. We'll hae a guid blether, an a dram
forbye...
— Aye. Catch up, ye ken. There's nivver ony
time...
— Naw. Nae time.

Ane o thae days. Aye. There's aye the morn. Whit wis it
Brutus said owre the corp o his freen:
I shall find time, Cassius ? But there wisna time enow.
The morn cam, an the sun didna rise for ye,
An ye gaed tae the yird: thon cauld empire
O the wurm an the moudiwarps.
We little jaloose the doon-the-brae doomin
the soomin
O the blastin see-bree in oor lives.

Ad te omnis caro veniet

The bruckle flesh ...
O Christ, I'm feart!

Kyrie eleison
Christe eleison

Dies Irae

Passin doon the straun I cam tae an auld biggin
Aa tummelt-doон: a rickle o mossit stanes
Wi a lanesome gable-end left staunin.

I minded oor wurd
Deid, dry —
Echoes frae times Lang by...

- They're takin care o ye?
- O aye. Canna complain. Aa mod cons.
- Onythin I can dae for ye?
- Naw, naw. Thanks for the grapes, mind.
- That's okay. We'll hae a wee get-thegether when
they let ye oot.
- Aye. Catch up on auld times, eh?
- Aye. The auld times.

Ye thocht ye'd hae time tae blether, dram in haun,
When the darg was owre-wi, an there wis easedom an rest.
But the daurk cam for ye instead. Whaur are ye noo
Ma auld frere? Whit day o calamatie an misery
Bides its doom-hour dawnin: laithly, muckle and bitter?

Tremens foetus sum ego, et timeo ...

I spied a wheen corbies, bleak an dour on the auld gable,
Black-gleamin, horn-nebbit

... *craw ... craw ...*

A rusty, drouthy girnin in the cauld eternuin

... *craw ... craw...*

A scrunt o black tungs ower splitten gless.

Sayin

We are the Deid —
Craikin on oor craw-steppit gable;
Keekin doon, quhaip-like, bidin oor time;
Huddroun, humph-backit hoodie-craws;
Auld spy-wives, spirran-like
Spurtle-leggity skelets,
Cripple and grisk.
Nae remeid:
We are the Deid.

Timor mortis conturbat me.

Agnus Dei

O Christ, I am feart o the daurk. No the black o nicht
But ma ain pit-mirk thochts, thon hairt-sair dool
At gars me grue, ma sowl doon-hadden —
Coorin doon, shroudit
In the deid-sheet o draggin doots.
Nae licht in ma sowl.
Whaur are ye noo, ma auld frere?
In the cauld mirk o thon lang hame is there
Nae glent o licht frae the lift?
Nae glimmer o the life tae come?

Lux aeterna lucent eis, Domine.

As for me, pair sinner at I am,
I am still feart

Timor mortis conturbat me

O the daurk. Ma ain daurk. Feart o masel.
Mair licht.

Mehr Licht!

Offertory

Fac em, Domine, de morte transire ad vitam

Frae the stour we cam, an tae the stour we maun gan:
I ken that.
But I canna faddon the eldrichness, the finality o't;
I jist canna thole it—the fecht tae come frae which
I canna flee, and canna win.
I tremmle, fear-f angit, thinkin

like auld Dunbar

O the deid's fell straik:
O the instant when I sail be feenisht—
By wi.

Ad te omnis caro veniet

But ye've trod this gate, ma auld frere.
It wis haurd tae let ye gang
On your wey, whaur I maun follow...
O Christ, yon day
When aa ma howps, ma luves; thae things
At mak me whit I am
Sail scudder awa like stour, blawn intil the lift.

Ad te omnis caro veniet

On your wey, auld frere.
It'll no be ower lang, I'm thinkin
Till I'll be wi ye. There isna muckle here
Tae bind me tae the yird—
Jist ma fear:
The loup intil the daurk I daurna mak;
The step intil the mirk I daurna mak;
When aa the here-an-noo sail brak
An clatter doon,
As I, like ye, ma auld frere, swound
An faa intil the daurk o eternity.
An it's funny, aamaist, for on that day

Dies irae

We'll hae time.

Time tae blether.
Tae catch up.
Time, time, wi nae end till't.

In Paradisum

In paradisum deducant angeli...

In heivan may the angels haud thee tae their
hairts

In tuo adventu suscipiant te martyres ...

At your winnin-hame may aa the martyrs
enfauld thee in their arms

Te perducant te in civitatem Sanctum Jerusalem ...

An lead ye intil the Halie Citie o Jerusalem

Chorus angelorum te suscipiat...

Whaur the choir o angels sail tak thee up

Et cum Lazaro quondam paupere ...

an, thegither wi Lazarus, umquhile
beggar-loon,

Aeternam habeas requiem. Amen.

May ye hae easedom an rest for evermair.
Sae be it.